

明史紀事本末

明史紀事本末

明史紀事本末卷三十

提督浙江學政僉事豐潤谷應泰編輯

麓川之役

英宗正統二年冬十月雲南麓川宣慰司思任叛侵南甸州洪武中麓川思倫發內附授麓川宣慰按思倫所居本麓川地與緬接境皆在金沙江之南在元爲平緬宣慰司思倫不言麓川蓋已據緬爲已有洪武中大兵下雲南改平緬爲麓川平緬軍民宣慰司麓川之名始見至二十九年平緬入貢更立宣慰司不相混一未幾思倫叛黔國公沐英討平之其後失

官改孟養宣慰使以刁氏代之正統初宣慰使刁賓
玉弱不能輯諸夷思倫發次子思任者狡獪踰父兄
差發金銀不以時納朝廷稍優容之會緬甸危思任
侵有其地遂欲盡復父所失故地於是擁眾叛於麓
川先是侵孟定灣甸大殺掠雲南總兵黔國公沐晟
以聞至是復侵南甸州土官刁貢罕地命沐晟遣官
齎金牌信符諭還所侵地思任不奉詔

三年冬十二月思任侵掠騰衝南甸畧取孟養地刁
賓玉奔永昌死無嗣思任屠騰衝據潞江仍自稱曰
法法滇王號也中國遂訛爲思任發云事聞上遣刑

部主事楊寧往諭之不服

四年春正月命鎮守雲南黔國公沐晟左都督方政
右都督沐昂率師討思任發太監吳誠曹吉祥監軍
兵至金齒思任發遣其將緬簡斷江立柵而守師不
得渡初思任未叛時刁賓王嘗遣詣晟晟兒畜之至
是晟遣指揮車琳等諭之降思任佯許諾晟信之無
渡江意刑部主事楊寧曰不可兵未加稱降此詐也
懼有後悔晟不從檄寧督餉金齒賊將緬簡數挑戰
政怒造舟六十艘欲渡江晟不可政不勝憤夜獨率
其麾下渡擊緬簡走之破賊柵賊奔景罕寨指揮唐

清擊敗之指揮高遠等又追敗之高黎共山下共斬三千餘級乘勝深入逼思任上江上江賊重地也遠攻疲甚求援於晟晟怒其違節制渡江不遣久之以少兵往至夾象石不進政渡江追至空泥知晟不力援已賊伏兵四起出象陣衝擊乃遣其子瑛還曰若急歸吾死分也遂策馬突陣死軍殲焉晟聞敗適春暮慮瘴發遂焚江上積聚倉卒奔還永昌至楚雄上遣使者責狀仍以四萬五千人助之晟懼罪暴卒思任發犯景東孟定殺大侯知州刁奉漢等破孟賴諸寨降孟連等長官司五月以沐昂爲左都督征南將

軍右都督吳亮爲副將軍馬翔張榮爲左右參將進討思任發昂上潞江之捷陞賞有差

五年春二月沐昂討麓川軍抵隴把去賊巢甚近右參將都督僉事張榮先令都指揮盧鉞擊賊大敗榮棄符驗軍器遁昂等不能救師還勅責沐昂等畱昂鎮守右都督吳亮左參將馬翔俱逮下理 秋七月思任發屯孟羅大掠據者章硬寨沐昂率都指揮方瑛柳英等進克之賊宵遁威遠州土知州刁蓋罕戰威江亦敗之已而思任發遣流目陶孟忙怕等入貢禮部議減其饗資上曰彼來雖緩我師而朕不逆詐

遂賚而不宴賜勅諭之

六年春正月命定西伯蔣貴爲征蠻將軍總兵討麓川思任發以太監曹吉祥監督軍務兵部尚書王驥提督軍務侍郎徐晞督軍餉初雲南總兵沐晟等議麓川險遠攻之非十二萬人不可宜徵兵湖廣川貴各委善戰指揮分三道灣甸芒布騰衝刻期並進上下廷議英國公張輔等言分兵勢孤彼或扼險邀我非萬全計宜擇大臣往雲南專征會思任發遣使謝刑部侍郎何文淵上言麓川之在南陲彈丸耳疆里不過數百人民不滿萬餘宜寬其天討官軍於金齒

且耕且守舜德格苗不勞征伐而稽首來王矣大學
士楊士奇主其說張輔謂思任發世職六十餘年屢
抗王師釋此不誅恐木邦車里八百緬甸等覘視窺
覬示弱小夷非策上從之遂命貴驥先赴雲南復以
副總兵李安參將宮聚領川貴兵副總兵劉聚參將
冉保領南京湖廣兵大發兵十五萬轉餉半天下驥
薦太僕寺少卿李黃郎中侯璉楊寧主事蔣琳等爲
參謀陸辭上賜驥貴等金兜鍪細鎧弓矢蟒衣以行
侍讀劉球上疏言麓川荒遠偏隅卽叛服不足爲中
國輕重而脫歡也先併吞諸部侵擾邊境議者釋豺

狼攻犬豕舍門庭之近圖邊徼之遠非計之得也請
罷麓川兵專備西北不報蓋王振專政欲示威荒服
也 十一月定西伯蔣貴兵部尚書王驥等討麓川
大破之思任發遁去先是思任發率眾三萬至大侯
州欲攻景東威遠兵部郎中侯璉都指揮馬讓盧鉞
擊之驥等遂進至金齒鎮康守陶孟刁門俸乞降令
右參將冉保以五千人入據之因其眾破昔刺寨移
攻孟通王驥誓師分三道進取參將冉保自緬甸趨
孟定會木邦車里之師驥同蔣貴中路至騰衝內官
曹吉祥副總兵劉聚等自下江夾象石合攻徑抵上

江上江者賊砦所在也攻二日不下會天大風驥命縱火焚柵大破之拔上江寨賊千餘猶迎戰官軍奮長戈蹴之賊將刁放憂父子俱沒刁招漢闔家自焚生擒刁孟頊先後斬五萬級上江平賊散走大兵由夾象石下江通高黎貢山道至騰衝畱副總兵李安戍之王驥等取道南甸至羅卜思莊令指揮江洪等以八千人抵木籠山思任發乘險以二萬人列七營相救副總兵劉聚參將宮聚分攻之不下驥貴同奉御監蕭保自中路進左右夾攻敗之斬數百餘級乘勝至馬鞍山破其象陣死者十餘萬麓川大震十二

月王驥等直擣巢穴山周三十里柵堅塹廣其東南
依江壁立以三千人探之賊象陣伏泥溝突起敗之
賊又自永毛摩尼寨至馬鞍山伺我後令都指揮方
瑛以六千人攻拔之瑛方政子也而右參將冉保從
東路合木邦車里大侯之兵先後斬三千三百九十
餘級於是進攻麓川積薪焚其柵思任發挈妻子間
道渡江走緬甸焚溺數萬驥等班師敘平麓川功進
封蔣貴定西侯王驥靖遠伯以郎中侯璉楊寧爲侍
郎餘陞賞有差

七年冬十月復命定西侯蔣貴靖遠伯王驥征麓川

緬甸先是思任發旣敗走緬大軍還復出爲寇上謂驥曰卿爲朕再行遂起兵如前復命驥等往討之

八年春二月定西侯蔣貴靖遠伯王驥軍至金齒遣諭緬甸送思任發軍前緬人佯諾不遣驥曰緬甸黨賊不可不討也乃至騰衝分爲五營與蔣貴及都督沐昂分道並進木邦宣慰使統兵萬餘駐於蠻江澣覘我軍容驥責以忠義賜牛酒遂感悅效死緬人擁眾大至蔣貴率兵蔽江而下焚其舟數百艘大戰一晝夜賊潰思任發復遁去俘其妻子班師蔣貴起自行伍屢立顯功與士卒同甘苦凡出征衣糧器械不

役一人臨陣身先士卒敵皆披靡必手擊殺數十人不知書然貴爲大將拱手聽人指揮無傲色故所向成功

九年春二月王驥合木邦等諸部進兵緬甸累捷緬人用大金縷船載思任發至江上覘我復匿之欲以麓川予木邦孟養戛里予緬甸始獻思任發詭以思任子思機發致仇爲解驥等乃縱兵擣思機發寨俘其妻子及從賊九十餘人象十一事聞上詔驥還京然思機發尚竊據孟養負固不服

十年冬十二月雲南千戶王政奉勅幣諭緬甸宣慰

男卜刺浪馬哈省索思任發未卽遣適晝晦二日術者曰天兵至矣卜刺浪馬哈省懼以思任發及妻子部屬三十二人付政思任發不食垂死政遂斬首函獻京師

十三年春三月初思機發復據孟養地爲亂屢諭不從復命靖遠伯王驥提督軍務都督宮聚爲總兵張軌田禮爲左右副總兵方瑛張銳爲左右參將率南京雲南湖廣四川貴州土漢軍十三萬討之以孟養舊宣慰刁孟賓爲嚮道又勅木邦緬甸南甸干崖隴川宣慰使刁蓋發等各輸兵餉命戶部右侍郎焦宏

督餉雲南十月師抵金沙江賊柵西岸以拒驥造浮梁以渡攻破之乘勝進至孟養賊斂眾據鬼哭山及芒崖山等寨皆攻拔之斬獲無算貴州都指揮使洛宣九谿衛指揮使翟亨皆戰死思機發竟失所在或謂死於亂兵也王師踰孟養至孟那孟養在金沙江西去麓川千餘里諸部皆震怖曰自古漢人無渡金沙江者今王師至此真天威也驥還兵部落復擁思任子思祿爲亂攻銀起莽敗之復據孟養地驥等慮師老度賊不可滅乃與思祿約許以土目得部勒諸夷居孟養如故復與立石金沙江爲界誓曰石爛江枯

爾乃得渡思祿亦懼聽命乃班師以捷聞詔增驥祿
賜鐵券子孫世襲伯爵

谷應泰曰麓川地接平緬雖彈丸黑子然固皇
輿以內地也洪武初思氏失官刁氏逐思據有
平緬至正統時刁又衰弱思氏復振賓玉走死
思任坐大且爭衡上國矣蠻夷自相攻殺趙奢
所謂兩鼠鬪穴天子不必問也天使亟行誚讓
數四而尉陀箕踞初無降意子陽不省乃更治
兵倔強如是而討逆之旗不見於金齒問罪之
旅不戰於昆池尚謂國有人乎且宣帝卽位已